

Tiwei Pol Kewisik Ken Mit Ne Wit Korin - 2

Menmen me tiwei ik

Pol kitehi God katip hirak yaaik ekentar hirak kekepik *1:1-11*
Pol kewepyapir menmen mau mekre han kirak ekatip mit ne Korin em
1:12-7:16

Him me kolekta mit ne Korin nansiuwerem emamno mit ne Judia *8:1-9:15*
Pol naanmipre hirekes me hirak keit eniuk iuwe aposel *10:1-13:10*
Pol katip mit ne Korin him mikaru *13:11-14*

1 ¹Hi Pol hi hire mitik aposel ke Krai Jisas hatip mit him mirak. Nipaa God hanhan kewisa hi hire mitik aposel hi hiriak menmen mirak. Hi hetike kiau yinak Timoti hawir wik wewis tiwei ik wesiuwerek kaknen yi mit miyapir ne weiwik me God yi yau wit Korin ke provins Akaia, yi yetike mit miyapir ne God yerer wit wit yeti provins eik e. ²Hi hanhan God Haai kiau ketike Mitik Iuwe Jisas Krai hirakit tatrekyi menmen yaaim yi eiyu werek werek.

Pol katip God hirak yaaik kentar hirak kekepik

³Haiu emwenipi niuk me God, hirak Haai ke Mitik Iuwe kiau Jisas Krai. Haiu mertei hirak Haai ke han teweninai, hirak Haai ke kekepai. ⁴Hirak kakikepai han kiau me menmen enum mamnen te haiu han etwenin mit miyapir han haiu emkepi me menmen enum mamnen. Haiu emkepi emriuwe menmen God nepei kekepai keriuwerem. ⁵Him im yaaim. Menmen enum yapirwe mamnen mamraiwaank mamir ke nipaa menmen mewaank Krai. Mar ke menmen enum meraiwaank, te Krai kakikepai me menmen te haiu han yaaik mamu. ⁶Mit niriak hi hetike Timoti enum nerawirwaank nentar hawir wetpi him yaaim me God, hiram mekepi yi han yaaik eiyu yi yertei God kakikepi maain kaknen

^a 1:1 1Ko 1:1 ^b 1:2 1Ko 1:3 ^c 1:3 Ef 1:3; 1Pi 1:3; Ro 15:5 ^d 1:5 Sam 34:19, 94:19
^e 1:6 2Ko 4:15

kaktihis. Mit nerekyawir enum, te God kekepawir. Menmen im mamkepi yi han yaaik eiyu eiyintar maain menmen enum mamnen mamriwaank yi yertei God kakikepi kakir ke hirak nepei kekepawir. ⁷Hawir wertei werek werek me yi mit. Menmen enum mamriwaank mamir ke menmen enum merawirwaank, hawir wertei God kakikepi yi han yaaik eiyu eiyir ke God kekepawir han yaaik wepu.

⁸^fNawir yinan, hawir hanhan yi yertei werek werek menmen enum nepei man mewepir weit provins Esia. Menmen enum epei man hiram mewewir han kawir te hawir han kitet hawir wawi. ⁹Hawir han kitet hawir wawi wawir ke mitik kerek mitik masistret hirak nepei katip hawir wawi. Menmen im nepei man mekepawir wertei hawir hirekses ap wawinin menmen im au. Hiram mekepawir te hawir wertei God kerek hirak kikian mit nipaa naa hir pike nekrit, hirak kerekek kakikepawir. ¹⁰^gHirak nepei kekepawir me menmen enum te hawir wawi au. Maain hirak pike kakikepawir. Hawir han kitet hirak in ere maain hirak kakikepawir naanmamrawir. ¹¹Yi mit eikepawir eiriuwe menmen yi eiyitehi God em kakikepawir. Yi yiriakem te maain mit miyapir yapirwe nanimtau God kemtau him hir nitiwekhi me hawir hirak kakikepawir, hir nanwenipi niuk mirak nantip hirak yaaik.

Pol keweikin han kirak te hirak ap kan wit Korin au

¹²^hHaiu han yaaik meriuwe menmen im. Han kaiu kitet menmen haiu miriakem haiu mises menmen yaaim God kewetaiyem haiu ap mari han ke mit miyapir meriuwerem au. Menmen me ti mit nerteiyem ap mekepapai haiu miriakem au. God kerekek kekepapai haiu miriakem. Haiu mises menmen im mekre nimin ne mit miyapir ne ti, te haiu misesim wisenum mekre nimin ne yi mit miyapir. Te haiu han yaaik meriuwe menmen im. ¹³⁻¹⁴ⁱHim hi hewisiyem mau tiwei ik, as o hir hiram ap misawin mire him tok piksa au. Menmen yi yekinaam hiram keremem hi hetpiyem. Hi hanhan yi eiyirtei werek werek menmen in ek yi yerteiyem kike kike me haiu mit. Te maain wi kerek Mitik Iuwe Jisas pike kaknen kaktaihis, haiu han yaaik mamriuwu yentar yi yayu yaitike Kraiss, yi han yaaik eiriuwe haiu mit aposel eiyintar haiu metpi him yaaim mekepi meriuwerem. ¹⁵Hi han kitet yi han kiteta hi hire aposel yaaik te hi hanhan hahinin anen ari, te hi akepi yi han yaaik eiyu mei wik. ¹⁶^jHi nipaa han kitet hi ahinin anen ari yi yeit wit Korin me wi hi ano provins hak Masedonia. Au, hi anaawiri hahit wit ki hi in ek han hau provins Masedonia. Maain hi anaawir Masedonia hi pike ano ari yi mit yeit wit Korin, te yi eikepa eiriuweta hi ano provins hak Judia, te hi ari mei wik. ¹⁷Te yi han kitet

^f 1:8 Ap 19:23; 1Ko 15:32 ^g 1:10 2Ti 4:18 ^h 1:12 Hi 13:18; 2Ko 2:17; 1Ko 1:17

ⁱ 1:14 2Ko 5:12; Fl 2:16 ^j 1:16 1Ko 16:5-6

wi kerek hi hewis tiwei hatip hi hanhan hahinin anen ari me wi hi ano provins hak Masedonia, hi ap han kitet menmen werek au. Te hi heweikin han kai a? Yi han kitet hi hire mitik enuk ke ti, hi hatip 'O, hi enen,' te hi hepakinem mekre han kai hi au hinapen a? Taauye! ¹⁸Mar ke him me God hiram yaaim, hi ap hetpi him 'O, hi anen,' te hi hepakinem mekre han kai hi au hinapen. Taauye! ¹⁹^kNipaa hi, Silvenes, Timoti, haiu mau metikewi haiu metpi him me Nikan ke God Jisas Krai. Yi yertei Krai hirak ap katip menmen hirak kakisesim te maain kakweikin sip kewet him nipaa hirak ketpim au. Hirak kakisesim keremem. ²⁰^lMenmen yapirwe God katip hirak kakriakem, Jisas hirak kakisesim kakrekuyiem. Wi haiu mamwenipi niuk me God mentar menmen im yaaim, haiu matip Mitik Krai hirak yaaik kakises menmen hirak katip hirak kakisesim. ²¹^mGod Haai kerek hirak kekepai haiu mit haiu metike Krai mau niutip. ²²ⁿGod hirekes kehimitenai haiu nirak, hirak kewis Himin kirak Yaaik kekre han kaiu, hirak kire menmen kike keteiknai menmen hirak kakwetai menmen yapirwe.

Pol ap ken kiri waswas au

²³^oHi hewisisiyek me menmen im te God kertei han kai kakwepyapirem. Te hi hetpi werek hi ap hewisesik me menmen au. Hi ap hinin han hiri yi mit ne wit Korin me wi hi hen provins Masedonia hentar hi hinapen heni yi mit arekyi yi han enuk. ²⁴^pHaiu ap metpi haiu minin naanmipri me menmen me God yi yisesim au. Haiu mertei yi yises God werek werek haiu miriak menmen metikewi mamkepi yi han yaaik eiyu.

2 ¹^qTe hi epei han kai kitet hatip har ik. Hi ap anen ari yi mit etpi menmen me han enuk heriuwerem. ²Hi anen etpi menmen te yi han enuk, te neimin nankepa hi han yaaik ehu a? Taauye! Yi mit kerek hi anipi yi han enuk keriyen. ³Hi hinapen anen ari yi mit miyapir en yi yenipa hi han enuk au. Hi hanhan yi eikepa hi han yaaik etikewi, te hi hinin hewisi tiwei men yi mit, hi hetpi menmen hi han enuk heriuwerem. Hi hertei wi kerek hi han yaaik heriwe menmen, te yi yapirwe han yaaik yetikewa me menmen. ⁴Wi hi hewis tiwei ken yi mit miyapir en, hi hewisik hirak au kerekyo han kai au toenuk te hi hikit. Hi hinapen henipi han enuk heriwe him hi hewisiyem au. Hi epei hanhan yi eiyrtei hi han tewenini wisenum keremem.

Pol katip hir mit ne Korin pike nanithis mitik nipaa kiriak enum

⁵^sMitik kerek kiriak menmen enum hirak ap kenipa han enuk au. Hirak kenipi keriyen yi han enuk. Hi hinapen hemipin hatip hirak kenipi

^k 1:19 Ap 18:5 ^l 1:20 Rev 3:14 ^m 1:21 1Jo 2:27 ⁿ 1:22 Ef 1:13-14; 2Ko 5:5; Ro 8:16-17 ^o 1:23 Ro 1:9; 2Ko 11:31 ^p 1:24 1Pi 5:3 ^q 2:1 1Ko 4:21; 2Ko 12:21 ^r 2:4 Ap 20:31 ^s 2:5 1Ko 5:1

yi yapirwe han enuk au. Yi mit han keriyen. ⁶Menmen yi mit yapirwe yerekiwekem me menmen enum hirak kiriakem hiram werék. ⁷Te in ek yi mit miyapir yi ap han ekitet menmen hirak kiriakem, nepei werék emit yi einaipisem. Yi eiyitpiwek him yaaim em eiyim eirekiwek han yaaik te menmen im ap mamrekiwek han kirak mamiwaankek. ⁸Te hi hitihi him iuwe te yi eiteikniwek yi wen han teweninek. ⁹Nipaa hi hews tiwei ken yi mit te hi hanhan hertei yi yaain yises menmen hi hetpiyem werék werék o au me yi yepir mitik eik kiriak menmen enum kakno. ¹⁰Yi mit miyapir yi ap han ekitet menmen enum hirak mitik hak kerekiyem. Yi han tiwaaiyem, te hi han tiwaaiyem emit. Menmen enum hiram mepu, te hi han tiwaaiyem emit, te hi hiriak menmen im atip Krai em, te hiram mamkepi yi yertei hi han tiwaaiyem emit. ¹¹Hi hiriak menmen im hentar hi hinapen Seten kakininai kewisisai me mitik kerek haiu nepei menerek mepirek. Haiu nepei mertei menmen enum Seten han kitet kakrekiyem.

Pol hanhan keriuwe Taitas keit wit Troas

¹²Nipaa hi hiniu hen wit Troas hewepyapir him yaaim me Krai, Mitik Iuwe God kinin ken kekekyor han te hir hanhan nanimtau him hi hetporem. ¹³Te hi han kai ap kepu werék werék au hentar hi hemerir kau yinak Taitas te hirak ap kan kira au. Hirak ap kan kira au, te hi hanhanek hi hinaaiwir wit Troas hi hen provins Masedonia hirek hirak ketpo me yi mit en.

God kikaap mit aposel hir ninin Seten

¹⁴Te in ek hi hitehi God hatip hirak yaaik. Hirak kekepai keriuwe menmen iuwe me Krai te haiu minin menmen me ti. God ketaihis kesiuwai haiu men wit heriyai heriyai haiu matip mit him yaaim me Krai. Him im hiram yaaim mar ke mit hir nemiwo (o nemiwin) tipar mekre heurek, maain hir newepim hiram minin meprer wit wit heriyai heriyai. ¹⁵⁻¹⁶^x Haiu mit aposel haiu mire menmen minin yaaim me Krai hirak kewepwarem kewet God em. Haiu mire menmen minin yaaim men minin ke mit miyapir kerek God kaktorhis. Me mit miyapir kerek God kaktorhis, menmen haiu misesim hiram mire menmen minin yaaim mamkepi hir nanu werék werék. Me mit kerek God ap kaktorhis nanino si, menmen haiu misesim hiram mire menmen minin enum menipi hir nani. Mit neimin hir nanirtei menmen im werék werék a? Taauye! ¹⁷^zYi yertei haiu mit ap mirak menmen mar ke mit yapirwe hir niriakem. Hir nepno heriyai heriyai natip mit him me God hanhan nanit pewek mererim keremem. Te hir ap nankaap mit miyapir au. Te haiu mit aposel

¹ 2:9 2Ko 7:15, 10:6 ² 2:11 Lu 23:31 ³ 2:12 Ap 14:27; 1Ko 16:9 ⁴ 2:13 Ap 20:1

⁵ 2:15 1Ko 1:18 ⁶ 2:16 Lu 2:34; 2Ko 3:5-6 ⁷ 2:17 2Ko 1:12; 1Pi 4:11

au. Haiu mit han kaiu yaaik haiu matip mit him yaaim me Kraiis mentar God kehimitenai haiu miriakem. Haiu metike Kraiis mau han kiutip, God kirai haiu matip mit miyapir him mirak.

Haiu miriak menmen matip mit him lo ham yaaim me God

3 ¹Menmen hawir wewisiyem menipi yi han kitet hawir wewenipi niuk mawir iuwe te yi yatip hawir yaaikit a? O au en, yi han kitet hawir war ke mit han hir neweti tiwei mit han ne wit hak newisiyek netpi hir mit yaain a? O au en, yi han kitet hawir hanhan yi yewisawir tiwei te hawir wauno wit hak wewet mit han ek, te hir nertei hawir mitikit yaaikit a? Taauye! Hawir winapen tiwei au! ²Yi mit miyapir keriyen yi yire tiwei hawir wetenenik kekre han kawir, yi yewenipi niuk mawir yeriuwe menmen yi yiriakem te mit miyapir han hir nirem nerteiyem. ³Menmen yi yiriakem meteikin mit miyapir han yi yire tiwei Kraiis hirak kewisik kesiuwerek me his me haiu mit aposel. Tiwei ik Kraiis ap kewisik keriuwe si yeunek mau nan mar ke nipaa Moses kewis him me God mau nan au. Hirak kewisik keriuwe God Himin Yaaik kirak kerek kepu tipmain tipmain enum eik, hirak kesiuwerek ken kekre han ki kewis him mirak mekre han ki.

⁴Hawir watip hawir mitikit yaaikit wentar hawir wertei God kehimitenawir wiriak menmen im. Kraiis kekepawir keriuwe menmen mirak iuwe kerek God Haai kewetiwekem, te hawir wawises menmen hawir wetpiyem. ⁵Hawir ap iuwe te hawir watip hawir wiriak menmen im wises han kawir weinik au. God kerekek kekepawir kewetawir menmen mirak iuwe te hawir wiriakem. ⁶God kerekek kekepawir te hawir watip mit menmen me him ham yaaim mirak. Him ham yaaim me God hiram ap him lo mau tiwei mit enisesim au. Hiram him yaaim matip mit God Himin Yaaik kirak kakikepi kaktorhis hir nanu werek. Him lo mau tiwei matip mit ap nanisesim werek werek te hir nani. Him ham yaaim me God Himin kirak Yaaik hiram mamkaap haiu mit te haiu mamu werek werek. ⁷God kewepyaan him lo, hirak kewet Moses em mau nan. Me wi hirak kiriakem, menmen me God iuwe merhihe mirius ninaan me Moses. Maain hiram pike mamre kike kike ere mamit, te mit miyapir ne Isrel ap nanirek pike te naanmewiriyapi me wi menmen me God merhihe mirius ninaan mirak. Menmen me him lo kerek menop haiu mit haiu mami, hiram man metike menmen iuwe me God merhihe. ⁸Te haiu matip mit miyapir him me God Himin kirak Yaaik, menmen im mirak menopai haiu han yaaik mepirpir wisenum minin menmen me nipaa me him lo me

^a 3:1 2Ko 5:12; Ap 18:27; Ro 16:1 ^b 3:2 1Ko 9:2 ^c 3:3 Eks 24:12; Jer 31:33; Esi 36:26-27
^d 3:5 2Ko 2:16 ^e 3:6 Jer 31:31; 1Ko 11:25; Jo 6:63; Ro 7:6 ^f 3:7 Eks 34:30 ^g 3:8 Ga 3:2, 5

Moses. ⁹^hHim lo kerek hiram menip haiu mit mami, hiram man metike menmen iuwe me God merhihe menip mit ninaain nepirpir, te him kerek mekepai te God kaktip haiu mit haiu yaain, hiram minin him me nipaa God kewet Moses em, te haiu han yaaik mepirpir iuwe. ¹⁰ⁱMenmen me God iuwe merhihe mirius ninaan me Moses mar ke nipaa ein hiram men mire kike kike ere mepeit. Mar im him yaaim nipaa God kewet Moses em hiram epei men kike kike mentar him ham yaaim me Kraiss me in ek God kewetaiyem hiram mekrehir miram. ¹¹Him lo me nipaa ein man metike menmen iuwe me God merhihe, te hiram pike mire kike kike ere meit, hiram in ek nepei au mesi. Te him in ek God kewetaiyem mamkepai haiu mire yaain te God kaktaihis, hiram minin him me nipaa mentar hiram ap te mamisi au. Hiram mamu mamit tipmain tipmain enum eik.

¹²Haiu mertei him ham yaaim hiram mamu mamit tipmain tipmain enum eik, haiu mamimerir menmen mirak merhihe iuwe mamnen te haiu ap mepakin him mei au. Haiu mewepyapirem te mit miyapir nerteiyem. ¹³^jHaiu ap miriak menmen Moses hirak kiriakem. Hirak kewis laplap pinam miwapin ninaan mirak te mit miyapir ne Isrel ap te nanir menmen yaaim me God merhihe mirius ninaan mirak men kike kike ere meit. ¹⁴^kMoses kewis laplap pinam miwapin ninaan mirak keremem au. Mit miyapir ne Isrel han kir ap nertei menmen me God werek werek au, hiram mire laplap pinam miwapin han kir. In ek, mit miyapir ne Isrel hir nererik nekine him me Moses, hir han kir ap nertei menmen me Kraiss werek werek au. Hiram mar ke laplap pinam wen miwapin han kir. Mit hir nemtau him me Kraiss hir nisesim, hiram mar ke God keit laplap pinam miwapin han kir, hirak kenemtin kewirem men. ¹⁵Nipaa ere in, mit nekine him me Moses, menmen mire laplap pinam miwapin han kir mentar hir ap nises him me Kraiss. ¹⁶^lMe wi kerek mit o miyapir neweikin han kir nises Mitik Iuwe Kraiss, hiram mar ke God keit laplap pinam miwapin han kir hirak kenemtin kewirem men te hir nertei menmen mirak werek werek. Hiram mar ke nipaa Moses ken kekrewinak ke God, hirak kenemtin laplap pinam keweikin ketike Mitik Iuwe tewepnak. ¹⁷^mMitik Iuwe keit him im hirak God Himin Yaaik. Hirak kepu kekrewinak han ke mit, hir ap te nanises menmen him me Moses ketpor te hir han kitet God katip hir yaain. Au, hiram ap mamkepai te God kaktip haiu yaain au. ¹⁸ⁿHaiu mit ap menmen miwapin han kiau au, te menmen yaaim me Mitik Iuwe hiram mau mekre han kiau. God Himin Yaaik kau kekrewinak han kiau keweiknai han kiau haiu pike meweikin mar ke hirak. Mit miyapir nanirtei God keweiknai han kiau, haiu mamir ke hirak te haiu mamwenipi niuk mirak maminterim.

^h 3:9 Diu 27:26; Ro 1:17, 3:21 ⁱ 3:10 Eks 34:29 ^j 3:13 Eks 34:33-35 ^k 3:14 Ro 11:25
^l 3:16 Ro 11:23, 26 ^m 3:17 Jo 8:32, 36; Ro 8:2; Ga 5:1 ⁿ 3:18 Eks 16:7; 24:17

Haiu mit aposel mewepyapir him yaaim hiram mire si

4 ¹God kerekek hirak han teweninai kehimitenai haiu miriak menmen mirak matip mit miyapir him mirak, te menmen enum man merekyei han kiau haiu ap minaain misesim iuwe au. ²Haiu meweikin sip mewet menmen enum misawin mit nanwepyapirem haiu yink enuk meriuwerem au emit. Haiu ap mewises mit him me God haiu meweikin him mirak matip mit hir enisesim. Au, haiu merp ninaan me God, God hirak kirai haiu metpor him mirak haiu matip him yaaim, te mit kerek nerteiyei han kiau, hir nertei him im hiram yaaim. ³Him yaaim haiu matip mit em, mit ap nerteiyem werek werek, hir keriyen nanino si hir ap nerteiyem. Hir ap nises him yaaim nentar tipir enuk ke ti ik Seten hirak kewenin han kir te hir ap nisesim au. ⁴Hirak kewenin han kir te hir ap nertei werek him yaaim me Kraiss. Him yaaim im hiram matip me menmen yaaim me Kraiss kerek keteiknai God kire mekak kar ke hirak kipre God. ⁵Haiu ap metpi him me haiu hiras te yi eitip haiu mit yaain. Au, haiu metpi him im. Jisas Kraiss hirekes Mitik Iuwe kiau, te haiu mit haiu mar ke wok mit mekepi yi eiyrteiyek werek werek. ⁶Haiu miriak menmen im mentar God kerek nipaa katip kar ik: “Me wit toto lait hiremes mamir,” hirak kerekek kekepai haiu mertei mekre han kiau menmen mirak yaaim merhihe nepei au man mau Kraiss.

⁷God kewis menmen mirak iuwe hiram man mekre han ke haiu mit ne ti au haiu weinin. Hirak kewisim mekre han kiau kakteikin mit miyapir ne ti menmen yaaim haiu miriakem ap meke han kiau man. Au, hiram meke God man mekre han kiau mekepai. ⁸Merer wit wit menmen enum man mewep te hiram ap meraiwaank au. Haiu ap mertei menmak menmen enum man mewep te haiu ap minaaiwir menmen haiu miriakem. ⁹Mit enun noyiyai nanrekyei enum, te God ap kinaiwirai au. Mit hir newep haiu menke te haiu ap maa au. ¹⁰Mit hir newep neriuwe nipin menmen ham yapirwe te hekrit hekrit sak mau yink kiau mar ke nipaa mit enun nenep Jisas sak mau yink kirak. Sak mau yink kiau te mit nanirem hir nanirtei Jisas Kraiss kepu ketikewei kakikepei te mit nanwep haiu mami au, haiu pike mamu werek. ¹¹Me wi haiu mepu ti im, mit hir noyiyai nanrekyei enum, haiu mami mentar haiu mises him me Jisas haiu matip mit em. Mit hir newep menep haiu mami, te mit nanir yink kiau kerek maain kaki, hir nertei Jisas Kraiss kepu kekepai haiu mami au, haiu pike mamu werek. ¹²Mit newep menep haiu mami te menmen im haiu miriakem hiram mekepi himin ki te yi yayu werek werek.

° 4:1 2Ko 3:6 P 4:2 2Ko 2:17; 1Te 2:5 ° 4:3 1Ko 1:18 ° 4:4 Ef 2:2; Kl 1:15; Hi 1:3

° 4:5 2Ko 1:24 ° 4:6 Jen 1:3; Ais 9:2; 2Ko 3:18 ° 4:7 2Ko 5:1 ° 4:8 2Ko 1:8, 7:5

° 4:10 1Ko 15:31 ° 4:11 Ro 8:36

¹³⁷Him me God kerek mitik Devit kewisim mau tiwei Sam hiram matip mar im: “Hi hatip mit menmen hentar hi han kitet God naanmamprau kakikepa.” Haiu mit in keriyen haiu han kitet God kakikepai kaktaihis kar ke nipaa hirak kikaap mitik hak Devit. Te in ek haiu matip mit him mirak. ¹⁴⁸Haiu matip mit menmen mentar haiu mertei God kerek nipaa kikiak Mitik Iuwe Jisas, hirak kaktaihis haiu mamtikewi haiu mamirp ninaan mirak. ¹⁵⁹Menmen yapirwe enum man menep haiu mit aposel, mentar haiu metpi him yaaim mekepi meriuwerem. Maain him yaaim me menmen God kerekyaayem mamno mamrer wit wit, mit nanisesim, hir nantip God hirak yaaik, hir nanwenipi niuk mirak me menmen im yapirwe hirak kiriakem.

**Menmen enum im hiram mire menmen weinim
mentar haiu mamit menmen yaaim**

¹⁶⁶Haiu ap han enuk minaaiwir menmen im God kehimitenai haiu miriakem mentar haiu mertei God kakikekeyei haiu mit, haiu yapirwe mamwenipi niuk mirak. Maain yink kiau hirak kaki, te hekrit hekrit God kikaap himin kiau hirak kau werek werek. ¹⁷⁷Menmen im enum hiram meraiwaank hiram mar ke menmen kike keremem, te hiram mekepai haiu mamit menmen yaaim me God wisenum hiram mamu mamit tipmain tipmain enum eik. ¹⁸⁸Tis, haiu ap te han ekitet menmen yapirwe haiu mirem meriuwe nanamir kiau au. Im em hiram mamu me mi mei kike te maain hiram mamawaank mamit. Haiu han ekitet mamimerir menmen haiu ap mirem wen au, te maain God kakwetayem. Menmen in ek haiu ap mirem, hiram mamu mamit tipmain tipmain enum eik.

Menmen mit aposel hir nisesim hiram mikaap han ke mit yapirwe

5 ¹⁹Haiu mertei maain yink kiau ke ti ik hirak kaki kakisine kakit. Haiu mami hiram mar ke mitik kau weisaak hirak ketpaan ken kewepik hirak kinaiwirek ken wit hak kekin hei weisaak hak. Haiu mami haiu mertei maain God kakrekeyei yink hak yaaik kakit wit kirak kaku kakit tipmain tipmain enum eik. Menmen im hiram mar ke winak yaaik God kimaak keit wit kirak haiu mamwim. ²⁷Him im yaaim. In ek haiu mau yink kiau ke ti ik, haiu han kitet menmen enum mewep te haiu hanhan mamit yink hak yaaik God kakwetayem kakit wit kirak. Hirak himin kiau kakikrerem te haiu mamu werek werek mamir ke mitik kau kekre winak keit ti ik hirak kekepik kau werek werek. ³Maain haiu mami haiu mamit yink hak yaaik God kakwetayek, haiu ap te mamu himin weinik au. ⁴⁸In ek haiu mau yink kiau ke ti ik, haiu mepu han

^⁷ 4:13 Sam 116:10 ^⁸ 4:14 1Ko 6:14 ^⁹ 4:15 2Ko 1:3-6 ^⁶ 4:16 Ef 3:16 ^⁷ 4:17 Ro 8:17-18

^⁸ 4:18 Kl 1:16; Hi 11:1-3 ^⁹ 5:1 2Ko 4:7; 2Pi 1:13-14 ^⁷ 5:2 Ro 8:23 ^⁸ 5:4 1Ko 15:53-54

kitet menmen yapirwe mewep mewetai han enuk. Haiu ap hanhan mami mamnaaiwir yink kiau ke ti ik au. Haiu hanhan mamit yink hak yaaik God kakweteiyek, hirak kakikrehir ke yink kiau ik. Te haiu hanhan yink kiau ik hirak ap kaki au. Haiu hanhan hirak kakweikin kakre yink hak yaaik kaku kakit kaktike God. ⁵God hirekes kerekek hirak kenipai han kiau te haiu mamit menmen yaaim mirak im. Hirak nepei kewetai God Himin Yaaik kau kekre han kiau keteiknai maain hirak kakwetai menmen yapirwe hirak kerekyeyem.

⁶Haiu mertei God kakwetai menmen yapirwe hirak kerekyeyem, te hekrit hekrit haiu han tokik mau meit. Haiu mertei wi kerek haiu mau ti mekre yink kiau ik, te haiu ap mau metike God meit wit kirak. ⁷Haiu ap mir menmen im God kerekyeyem, te haiu mertei haiu mamtiwem mentar God ap kewisesik au. Hirak katip werek werek kerekek. ⁸Hi hatip werek. Haiu ap minaain te haiu mami au. Haiu hanhan mamnaaiwir yink kiau ke ti te haiu mamu mamtike Mitik Iuwe God mamit wit kirak. Hiram minin yink kiau kau keit ti ik e. ⁹Haiu mau yink kiau me ti im e, o haiu mamit yink hak yaaik kakit wit kirak, hiram menmen weinim. Haiu eminin han ekitet emriak menmen God hanhan haiu emisesim emriakem. ¹⁰Hi hetpi menmen im hentar haiu mertei maain haiu yapirwe mamirp ninaan me Krais hirak han kakitet menmen enum haiu miriakem mekre yink kiau ke ti ik ek haiu miriakem. Hirak han kitet o skelim menmen haiu miriakem hirak kakrekyaai menmen yaaim o enum mamrerim.

Mit aposel nikaap mit miyapir netike God nekiyan nau neit

¹¹Wi kerek haiu matip mit miyapir him me God haiu miriak menmen mari han kir te hir nanisesim nentar haiu mertei maain Mitik Iuwe Krais skelim menmen haiu aposel miriakem. God kertei han kiau te hi hanhan yi yertei yekre han ki hi hises menmen yaaim hekepi heriuwerem yar ke God kertei. ¹²Haiu ap pike mari han ki te yi yatip him yaaim au. Haiu hanhan metpi him im te yi eiyirtei haiu menmak te haiu yaain. Te maain yi eitip mit han kerek han kitet menmen me niuk iuwe o klos yaaim hiram minin menmen mekre han ke mitik, yi yayitpor menmen im hiram yaaim au, hiram enum. ¹³Haiu mit haiu han kiau ken sip mar ke mit netpim, te haiu han ken sip kentar haiu hanhan miriak menmen mamkepi. ¹⁴Krais hirak hanhan haiu mit, te menmen im mari han kiau haiu miriak menmen mirak mikaap mit miyapir meriuwerem. Haiu miriak menmen im mentar haiu mertei hirak kiutipen kaa kekrehir ke haiu mit yapirwe, te hiram mar ke haiu mit yapirwe maa metikerek.

^h 5:5 Ro 8:16, 23; 2Ko 1:22 ⁱ 5:6 Hi 11:13-16 ^j 5:7 1Ko 13:12 ^k 5:8 Fl 1:23 ^l 5:9 Kl 1:10; 1Te 4:1 ^m 5:10 Ekl 12:14; Ro 2:16, 14:10 ⁿ 5:11 2Ko 4:2 ^o 5:12 2Ko 3:1, 1:14

¹⁵^pHirak kaa kekrehir kiau, te haiu mit keriyen haiu mepu ti ik, haiu ap emises han kiau mamriak menmen au emit. Haiu emises han ke mitik kiutipen ik kerek nipaa kaa, God kikiak pike kekrit kau kekepai haiu mit. ¹⁶⁻¹⁷^qNipaa haiu mit ne ti miriak menmen enum haiu han kitet me Krai mar im: Hirak mitik kerekek. Wi kerek mit miyapir nanises him me Krai nantikerek nanu niutip, hir neweikin nanir ke mit miyapir yaain. Menmen enum me nipaa hiram epei au mesi meit. Menmen yapirwe yaaim mamikrit mamikrehir ke menmen enum me nipaa ein. Te in ere maain haiu mit ap te han ekitet mit hir yaain o enun nentar hir niuk mir iuwe o hir netenen menmen yapirwe au emit! Menmen im hiram menmen enum me ti. Haiu han ekitet mit hir yaain nentar hir ne Krai keriyen.

¹⁸^rMenmen im me haiu meweikin mire mit miyapir yaain, God kerekek kiriakem. Krai hirak kaa kentar nu tentarakit. Te God keriuwe menmen im Krai kerekyeyem, hirak kekepai haiu mit kerek nipaa haiu enun nepan metike God. In ek haiu metikerek mekiyan mau meit. ¹⁹^sMenmen haiu metpiyem hiram mar im. God kekepai haiu mit miyapir yapirwe mau ti meriuwe menmen Krai hirak kiriakem. Te in ek God kehimitenai haiu nirak yaain. Hirak ap han kitet menmen enum haiu miriakem au. Hirak kesakem. In ek hirak kewetai haiu mit aposel him mirak me hirak hanhan haiu mit ne ti haiu mamtikerek mamkiyan mamu mamit. ²⁰^tGod kehimitenei haiu mekrehir ke Krai te menmen haiu metpiyem hiram mar ke God hirekes kau ketikewi ketpi. Haiu mikaap Krai haiu metpi him iuwe: “Yi eiwis God hirak kakikepi te yi eitikerek eikiyan eiyu werek werek.” ²¹^uKrai kerekek hirak ap menmen enum mamu han kirak au. Te God kekepai haiu mit hirak keit menmen enum yapirwe haiu miriakem kewisim mentar Krai hirak kekrehir kiau kaa. Hirak kekrehir kiau kaa te haiu mit miyapir kerek haiu mamises him mirak, God kaktip haiu yaain.

Menmen enum mewaank mit aposel kerek natip mit him me God

6 ¹^vHi Pol hetike Timoti hawir wetike God wiriak menmen miutip. Te hawir wetpi him manp, yi nepei yewis menmen yaaim God kerekyiem hiram mekre han ki te yi ap eiwenem ap mamkepi au emit! ²^wYi ap eiriak menmen im au emit! Him me God mit newisim mau tiwei matip mar im:

“Me wi hi God hanhan ekepi yi yitauhi menmen hi hemtewem hekepi heriuwerem. Me wi hi himat hi atihis yi mit miyapir yau ti, hi hekepi.” Yi nikip emnep eiyimtau! In ek God hanhan kakrekhi yaaim. In ek hirak kakikepi kaktihis.

^p 5:15 1Ti 2:6; Ro 14:7-8 ^q 5:17 Ro 8:1, 10; Ga 6:15; Ais 43:18; Rev 21:5 ^r 5:18 Ro 5:10
^s 5:19 Ro 3:24-25; Kl 1:19-20 ^t 5:21 Jo 8:46; Hi 4:15; Ga 3:13; 1Ko 1:30; Fl 3:9 ^u 6:1 2Ko
 5:20 ^v 6:2 Ais 49:8; Lu 4:19-21

³Haiu mit minapen mit han hir han kitet menmen haiu miriakem me God hiram enum, te ap miriak menmen miutip mamri han kir enuk te hir nantip haiu enun au. Haiu mamriak menmen enum hiram mamir haiu mamwis nan mamwaai yayiwe te mitik kakitet yayiwe kaknen kakrewo nan im kakinkewin. Te haiu au minapen hir han kitet haiu miriak enum au. ⁴*Au, me menmen yapirwe haiu miriakem, haiu meteikin mit haiu mire wok mit ne God. Haiu meteiknor menmen mar im: Haiu han tokik mepu me menmen enum man mewep, me menmen enum merekeyei enum metike menmen enum man meraiwaank. ⁵*Mit hir niwaai nipin newep, hir newisei mekre winak enuk ke gavman, mit enun hir nererik neweiknei nenepip nanwep. Haiu miriak menmen iuwe ere haiu meweivei. Wi ham haiu ap miwaai werek werek au, wi ham haiu mit ninpi mewe. Menmen im enum yapirwe man haiu mit mentar haiu mewepyapir him mirak. ⁶†Haiu miriak menmen yaaim keremem, haiu mertei menmen yaaim me God. Haiu ap han enuk meriuwe menmen waswas au, haiu han yaaik keriyen mikaap mit. Menmen im haiu miriakem meteikin mit haiu wok mit ne God. Menmen iuwe me God Himin Yaaik kau kekere han kiau, haiu han tewenin mit miyapir han. ⁷‡Haiu mewepyapir him yaaim, God kekepai haiu miriak menmen mirak. Haiu mises menmen yaaim hiram mekepai menip him enum mit nesweiyem hiram mami mar ke nopen kekepai kisawin yink kiau. Him yaaim me God haiu matip mit em hiram mekepai merekir han ke mit mar ke hine yipo henmik mikaap mit nenep mit enun nepan nir neriuwerem. ⁸§Mit han hir natip haiu mit yaain miriak menmen yaaim. Mit han au hir natip haiu enun hir netpepai nisisai haiu enun. Hir han kitet haiu mit enun mipin te haiu au. Menmen im hiram menmen weinim. Haiu mises menmen haiu miriakem. Haiu matip him yaaim keremem. ⁹¶Haiu ap metenen tiwei matip mit me haiu hiras haiu neimin. Te mit yapirwe nerteiyai haiu mit aposel keriyen. Mit han kitet menep haiu mami, te haiu wen au mepu. God kewis mit newep te hirak naanmiprai haiu ap mami au. ¹⁰‡Menmen enum mari han kiau mamrekeyei han enuk te haiu au hekrit hekrit han yaaik mepu. Haiu mire mit enun ap metenen menmen aurei. Te haiu mikaap mit hir netenen menmen me God yapirwe. Haiu mire mit metenen menmen me ti au, te haiu metenen menmen yaaim ap te mit naniriyaam mamno taau!

¹¹‡Yi mit miyapir ne wit Korin. Hawir nepei wetpi wewepiyapir han kawir wepakin menmen au. Hawir han tewenini wisenum. ¹²¶Hawir hirekses ap wewenin han kawir au. Hawir han tewenini wisenum. Te yi mit au, yi hiras yewenin han ki ap han teweninawir au. ¹³‡In ek, hi hetpi

* 6:4 2Ko 4:2 † 6:5 2Ko 11:23-27 ‡ 6:6 1Ti 4:12 § 6:7 1Ko 2:4 ¶ 6:9 2Ko 4:10; Sam 118:18 † 6:10 2Ko 7:4; Fl 2:17; Kl 1:24 ‡ 6:13 1Ko 4:14

har ke haai katip nikerek nirak, hi hetpi har ik: “Yi han teweninawir yayir ke hawir epei han tewenini yi mit miyapir.”

Haiu mit yaain ne God ap mamtike mit enun mamu niutip

14^dYi mit miyapir kerek yises him me God yi yetike mit miyapir han ap nises him me God, yi ap yaikiyan yairiak menmen o eiyisesim au emit! Menmen yaaim, menmen enum ap te mamkiyam mamu werek werek taau. Mamirkeik te witaan wanewik mamkiyan mamu wi miutip a? Taauye! 15Yi han kitet Krai ketike Seten tekiyakit a? Taauye! Mamirkeik te mitik kises him me God kaktike mitik ap kises him me God han kitet tipirakit a? Taauye! 16^eMamirkeik te mit nanwenipi God kaktike teinik mit newis ninaan mewim mekre pak? Taauye! God han enuk kakwep haiu mit! Haiu mit miyapir keriyen haiu mar ke winak ke God kerek kepu kepeit. God hirekes katip kar ik:

“Hi ano mit miyapir ehu ekreri. Hi hire God kir, te hir nanir ke mit miyapir nai.” 17^fTe God katip,

“Yi einaaiwir menmen enum mit miyapir enun nisesim, yi eiweikin sip eiwetiwem. Yi einopin menmen hiram enum ap eisesim au, te hi atihis.

18^gYi yisesim te hi hire haai ki, yi eire nikerek hirakit o nikerek hiram (o hiran) nai.” God kerek hirak kiriak menmen yapirwe me ti metike nepni, hirak katip kar ik.

7 1Naiu yinan yaain, God nepei ketpai him yaaim im, te haiu emipir emnopin emkeipin menmen yapirwe haiu miriakem menipai han kaiu ketike yink kaiu enuk. Haiu minapen mamriak menmen mamnip God yink enuk kakriuwai te hirak kehimitenai haiu nirak yaain.

Mit ne Korin neweikin han te Pol han yaaik keriuwari

2^hYi mit miyapir yi han etweninai. Haiu ap miriak menmen enum me mitik kiutip ke yi mit au. Haiu ap mewaank mitik kiutip ke yi mit au. Haiu ap mewisesiyek me menmen mari menmen me mitik kiutip au, mar ke mit han ein netpiyem me haiu mit. 3ⁱHi ap hetpi him im heni heswi him wisenum hentar yi han kitet hi herekyi enum au. Hi heni kike keremem hentar nipaa hi hetpi te hi hetpi heteipim, haiu mit in han tewenini wisenum. Haiu han tewenini wisenum te yi yayi, haiu hanhan mami mamtikewi, o au en, yi yayu, haiu hanhan mamu mamtikewi. Te haiu markeik miriak menmen enum im mit han netpiyem me haiu mit a?

^d 6:14 Ef 5:7, 11 ^e 6:16 1Ko 3:16; Lev 26:12; Esi 37:27 ^f 6:17 Ais 52:11; Esi 20:34; Rev 18:4 ^g 6:18 2Sml 7:14; Ais 43:6; Jer 31:9; Rev 1:8 ^h 7:2 Ap 20:33; 2Ko 12:17 ⁱ 7:3 2Ko 6:11-12

Taauye! ⁴Hi ap hisawin menmen mekre han kai au. Hi hewepiyapirem hetpim. Hi han yaaik wisenum heriuwe yi mit miyapir en. Menmen enum man mewep haiu mit, hi wen han kitet menmen yi mit yiriakem te hi han kewe hi han yaaik heriuwi.

⁵Haiu nepei man provins Masedonia, haiu wen ap mepu werek werek au. Menmen enum nepei man mewep. Haiu metike mit han haiu menahan me menmen, haiu minaain te menmen yapirwe haiu merekiyem mekre han ki mit han enun nanriwaankem. ⁶^kTe God kerek kerekyai han ke haiu mit me menmen hiram meraiwaank han kaiu, hirak kenipawir han yaaik keriuwe mitik Taitas kerek kan kirawir. ⁷Hirak keriuwet mitik Taitas kan kirawir kerekyawir han yaaik keriuwe menmen im keremem au. Hirak ketpawir hirak nepei ken kiri te yi yerekiyiwek han kirak yaaik yeriuwe menmen yaaim yi yisesim yiriakem. Hirak kan ketpawir yi hanhan yaira, yi yink enuk yeriuwe menmen yi yiriakem yi han tewenina, yi yekrehir kai yatip mit han hir natip hi enuk yi yetpor hi yaaik. Yi yiriak menmen im yenipa hi han yaaik heriuwi.

⁸Tiwei kerek nipaa hi hewisiyek hirak kenipi yi yink enuk yeriuwerek, hi ap han enuk heriuwe hirekes me hi hewisiyek au. Hi hinapen hewisi tiwei hentar hi hertei hirak kaknipi yi yink enuk me wi meiyam. ⁹Te in ek hi han yaaik hi hewisiyek. Hi ap han yaaik yi yink enuk yeriuwe menmen hi hewisiyem au. Hi han yaaik yi yink enuk yi yeweikin han pike yises menmen yaaim. God keit menmen im hi hewisiyem hirak keiyim keweikni han ki te hawir ap weriwaank au. ¹⁰^mGod keit menmen im menipi yi yink enuk hirak keiyim keweikni han ki te hirak kekepi kaktihis kakiriwerem. Menmen im hiram yaaim te haiu ap han enuk meriuwerem au. Menmen menip mit miyapir ne ti hir han enuk hiram ap mekepi nanweikin han nanises menmen yaaim au. Hiram mewetir han enuk neriuwe hiras keriyen. Menmen im ap mamkepi hir nanu werek werek au. Hiram mamnipi maain hir nani. ¹¹Yi han ekitet menmen im werek werek. God kerekki menmen yaaim keriuwe him im hiram menipi yi yink enuk yeriuwere. Hiram mekekiyi han ki yi hanhan einaiwirem eiweikin sip eiwet menmen enum hi hewisiyem nipaa ein mau tiwei hak. Hiram mekekiyi han yi yene mitik hak kerek kiriak menmen enum. Yi yeperper menmen enum im nepei man, yi hanhan hi anen akepi ariuwerem. Yi hanhan eikaap mitik kerek kiriak menmen enum. Menmen yapirwe yi yisesim yiriakem me him hi hewisiyem, hiram meteikin yi yetike mitik ik enuk yi ap yau han kiutip me menmen hirak kiriakem. Au, yi han enuk yeriuwerek yi yepirek ken.

¹²Hi ap han kitet mitik nipaa kiriak menmen enum te hi hewisi tiwei au. Hi ap han kitet mitik nipaa mitik hak kerekkiyiwek enum te hi hewisi

^j 7:5 2Ko 2:13 ^k 7:6 2Ko 1:3-4 ^l 7:8 2Ko 2:4 ^m 7:10 Mt 27:3-5; Hi 12:16-17

tiwei au. God kertei han kai hi hewisi tiwei ik ek kakikepi kakteikni te yi yertei werek werek yi hiras keriyen hanhanai haiu mit aposel in. ¹³Menmen yi nepei yiriakem hiram menipai han kewe mau meit keriyen au.

Menmen yi yiriakem hiram mikaap Taitas han kewe kau keit, te haiu metikerek haiu han yaaik wisenuk. ¹⁴Nipaa hi hewenipi niuk mi hatip Taitas yi yaain, te menmen yi yisesim yiriakem ap menipa hi yink enuk hi hetpiwekem au. Menmen yapirwe hi hetpiwekem me yi mit miyapir en hiram yaaim, mar ke him nipaa haiu metpiyem hiram yaaim. ¹⁵Taitas hirak ken kiri, yi yinaain yeperper yi naanmiprewek, yi yapirwe yises menmen hirak ketpiyem. Hirak han kitet menmen im te hirak han tewenini wisenum. ¹⁶In ek hi hertei yi eiyses menmen yapirwe hi hetpiyem, te hi han yaaik wisenuk.

Mit miyapir ne weiwik me God hir enkaap nir yinan

8 ¹Naiu yinan, haiu hanhan metpi him te yi eiyrtei werek werek menmen yaaim God kiriak mit miyapir ne weiwik mirak em neit Masedonia. ²Menmen enum nepei man manip mari han kir. Hir mit enun netenen menmen au, te hir han yaaik wisenuk nentar hir nertei God kesak menmen enum mir. Hir han yaaik te hir newis pewek mir men niutip nanwet mit han em. ³Hi hertei werek te hi hetpi hir nises han kir kerekek newis pewek im. Hir newis pewek pinam hir netenen pinam, hir hanhan nanwetir meiyam te hir newisim ere mir mesi hir netenen kike. Haiu ap mari han kir hir niriakem au, hir hiras keriyen. ⁴Hir nitaihi him manp te haiu emwisi hir nanwir pewek nantike mit han ne weiwik miutip me God nerer wit wit, hir nansiuwe pewek meiyam im mamno mamkaap mit han ne weiwik me God kerek ap netenen menmen au. ⁵Hir ninin menmen haiu han kitet hir nanriakem. Hir ninin neweikin han kir ken God. Nepei au, hir nemerir God ketpor menmen hirak hanhan hir nanisesim neriuwe him haiu metporem.

⁶Haiu han kitet menmen im mit ne Masedonia hir niriakem, haiu matip Taitas him manp te hirak kakno kakikepi yi mit eiriak menmen im me pewek kerek yi eikaap mit eiriuerem. Nipaa Taitas kekeyi han ki te yi eiriakem, te hi hanhan pike eriuwetek hirak kakno yi mit kakikepi yi eiriakem ere werek. ⁷Me menmen yapirwe, yi mit yinin yiriak menmen yaaim. Yi mit yises God werek werek, te yi yatip mit han him mirak yeriuerem. Yi mit yertei him me God werek werek te yi yikaap mit miyapir yeriuerem. Yi han teweninai wisenum, te haiu hanhan yi eiysin mit miyapir han yi eiwis pewek emno niutip emkaap mit miyapir eiriuerem. ⁸Hi ap hewisi him lo yi eiysesim au emit! Hi

ⁿ 7:15 2Ko 2:9 ^o 8:1 Ro 15:26 ^p 8:4 2Ko 9:1-2 ^q 8:7 1Ko 1:5, 16:1-2

nepei heteikni mit miyapir han hir hanhan nanwir pewek nankaap mit miyapir han nanriuwere. Hi hekeyi han ki heriuwe him hi hetpiyem me mit miyapir, te hi hertei yi han tewenin mit miyapir han werek werek yi eikepi o au. ⁹Hi hanhan ekeyi han ki hentar yi nepei yertei menmen yaaim Mitik Iuwe kiau Jisas Krai hirak kiriakem. Hirak ketenen menmen yapirwe ketike God te hirak keweikin sip kewet menmen im, hirak keweikin kire mitik enuk weinik. Hirak keweikin kire mitik enuk weinik kenteru yi mit, te hirak kakikepi yi eiyit menmen yaaim em me God yapirwe. Te yi eiyises menmen mirak hirak kiriakem yi eikaap mit miyapir han.

¹⁰Hi hetpi han kai me menmen im. Tito me nipaa ein, yi yinin yari pewek yewisim men miutip. Yi yinin mit han yi hanhan yewisim men niutip waswas. ¹¹Te in ek yi eiri pewek meiyam eiwisim mamno niutip ere werek. Yi nipaa hanhan yinin yiriak menmen im, te in ek yi yiriakem yeriuwe pewek mei yi yetenenim. ¹²Mit hir hanhan nanwet mit miyapir ne God menmen, God han yaaik keriuwe mit nar ik. God han kitet menmen mit hir netenenim, te hirak han kitet menmen mit niriakem neriuwerem. Hirak ap hanhan pewek mit ap netenenim hanhan mit nanwet mit han em au. Hir mir.

¹³⁻¹⁴Hi ap hatip yi eiwet mit han neit Jerusalem pewek mi einemtin, te hir nanu werek, yi au yau weinim pewek auri. Au, hi hanhan yi eiwetir meiyam eiyintar in ek yi yetenen pewek mei yapirwe, hir au pewek mir kike keremem. Maain, hir nantenen menmen yapirwe, te yi au menmen kike, maain hir naniswi pewek meiyam nankepi nanriuwere. Mar im yi yapirwe eiyu werek werek eiyiran. ¹⁵Him em God kewet Moses em kewisim mau tiwei matip mar ik: Mit kerek nen neit menmen mana yapirwe, ap mei mau au. Hir naam nenepim. Mit kerek nen neit menmen mana kike, hir ninpi maan au, hir naam ere werek." Te yi eikaap mit han kerek hir pewek auri, te hir nanu werek.

Wok mit hir naninen wit Korin nankepi

¹⁶Hi hatip God hirak yaaik. Hirak kikiak han ke Taitas hirak hanhan pike kakikaap yi mit kar ke hawir hanhan waukepi. ¹⁷Hawir witiwekhi hirak kaknen kakri, te hirak kewenhi. Te hawir ap wari han kirak au. Hirekes kises han kirak hirak hanhan kaknen kakri. ¹⁸Haiu mamriuwet kiau yinak kaknen kaktike Taitas. Mit miyapir ne weiwik me God nerer wit wit menep in, hir newenipi niuk mirak nentar hirak yaaik katip mit him me God. ¹⁹Hir newenipi niuk mirak kerek au. Hir nehimitanek hirak kakno kaktikewai mamriyan haiu mamriak menmen im mamit pewek kerek mit miyapir newisim men niutip nanwet mit

^r 8:9 Mt 8:20; Fl 2:6-7 ^s 8:12 Mk 12:43 ^t 8:14 2Ko 9:12 ^u 8:15 Eks 16:18

enun netenen menmen au, nanwetirem. Haiu mamriak menmen im te mit hir nanwenipi niuk me God mamriuwere, hir nanirtei haiu hanhan mamkaap mit nanriakem. ²⁰Haiu minapen mamkiak han ke mit miyapir, te hir nantip enum nantip haiu ap mamwet mit enun pewek auri pewek im yapirwe kerek mit miyapir newisim men niutip. Te haiu nepei mari kaiu yinak ik kaktikewai mamno heriyai heriyai naanmamre menmen haiu miriakem. ²¹Haiu han kitet emriak menmen yaaim me Mitik luwe God kerekek au. Haiu hanhan mit miyapir yapirwe hir nanirtei haiu miriak menmen yaaim.

²²Te haiu mamriuwet kaiu yinak yaaik ik kaknen kaktike mitikit wik. Haiu nepei han kitet menmen yapirwe hirak kiriakem haiu mertei hirak kiriakem werek werek. In ek, hirak kertei yi yises menmen yaaim me menmen yi yiriakem, te hirak hanhan wisenum kaknen kakriak menmen im. ²³Mit han nanitihi me Taitas hirak keimin, yi eiypor hirak wariyakit kai ketikewa hawir wiriak menmen miutip wekepi weriuwere. Me mitikit wik kerek tatkiterek tatnen yi mit, yi eitip mit han hirakit taiu yinakit yaakit kerek mit miyapir ne weiwik me God (o sios) menep in hir nehimitaniwekit tatnen. Mitikit hirakit tiriak menmen me God tikaap mit miyapir teriuwere tatip mit miyapir niuk me Krai teriuwe menmen hirakit tiriakem. ²⁴Te yi eiteiknor yi han etweninet yi naanmampruwekit. Yi eiriak menmen im te mit miyapir ne weiwik miutip me God heriyai heriyai nanirtei yi yaain yar ke nipaa hi hetpore me yi mit miyapir en.

Him me pewek mamno mamkaap mit miyapir neit provins Judia

9 ¹Yi nepei yertei me pewek haiu mamtiwem mamsiuwem mano mamkaap mit miyapir ne weiwik miutip me God neit provins Judia. Te hi ap hewisi tiwei nokik hetpiyem au. Kike kerekek. ²Hi hertei yi hanhan yaikaap mit miyapir ein, te hi hewenipi niuk mi hatip mit miyapir ne God neit provins Masedonia hetpor har ik: “Naiu yinan neit provins Akai, tito nipaa ein hir nepei nankaap mit miyapir neit Judia.” Hir nertei yi nepei yaikaap mit miyapir en, te menmen im yi yiriakem hiram mekekkyr han kir te hir nanriakem. ³Hi hinapen him yaaim hi nepei hatip mit ne yi mit em hiram mire him weinim au. Te hi heriuwet kaiu yinak Taitas ketike mitikit wik it tatinin tatnen yi mit tatkepi yi yaiwis pewek mamno niutip werek werek. ⁴Haiu han kitet yi eiwis pewek werek werek te hi han kitet maain hi etike mit han ne provins Masedonia haiu mamnen mamri, yi ap yewis pewek werek werek au, yi yink enuk. Hi yink enuk hentar hi hetpor yi nepei yaiwis pewek mamno niutip. Hi yink enuk, te yi yink enuk. ⁵Hi han kitet menmen im te hi hitehi taiu

^v 8:24 2Ko 7:13-14 ^w 9:1 2Ko 8:1-7

yinakit it hirakit tatinin tatnen tatkepi yi eiwis pewek mamno niutip werek werek. Maain hi anen etike mit ne provins Masedonia, menmen mamwaai werek werek. Mar im hir nanirtei yi nepei yises han ki yewis pewek im, te haiu ap mari han ki meriuwerem au.

⁶xYi han ekitet menmen im. Yi eiwet mit menmen kike te maain yi eiya menmen kike me God. Hiram mar ke mitik kakmir ni. Hirak kakmir ni kike, hirak kakit menmen kike. Hirak kakmir ni iuwe, hirak kakit menmen yapirwe. ⁷yYi mit miyapir niutip niutip yi eiynin han ekitet werek werek menmen me pewek yi eiwet mit em, te maain yi yairiakem. Yi ap eiriak menmen me pewek eiwisim eiyyantar mit han nari han ki yi yink enuk au emit! Yi eiriak menmen im te maain yi han tewenin pewek mi epei yewetirem. Menmen im au emit! God hanhan yi eiwis pewek emno niutip eiyyantar yi hanhan eikaap mit eiriuerem. ⁸God nepei luwe te hirak kakweti menmen yaaim heriyai heriyai maminin menmen yi yetiwem. Hekrit hekrit hirak naanmiri menmen te yi yetinen menmen naanempre hiras eiriuerem, meiyam mamu te yi eikaap mit miyapir han eiriuerem. ⁹zHim me God mit newisim mekre tiwei Sam hiram matip mar im:

“Mitik kerek kises him me God hirak kikaap mit enun menmen auri. Menmen yaaim hirak kerekoyem hir han kitetim tipmain tipmain enum eik.”

¹⁰aHim im yaaim mentar God kerek kewet mit wit (o rais) yehes hir nanmir te hir nanit menmen meriuwerem, hirak kakweti menmen marim, hirak kaknipem yapirwe te yi eikaap mit miyapir han eiriuerem yapirwe enum yapirwe. ¹¹bGod kakweti menmen yapirwe heriyai heriyai te yi eikaap mit miyapir han ne God eiriuerem yapirwe. Te maain haiu mamnen mamit pewek yi yewisim men niutip, haiu meiyim mamno mamwet mit han em, hir nanwenipi niuk me God me menmen yi yerekyorem. ¹²cMenmen im yaaim yi eiriakem hiram mamkaap mit miyapir ne God kerek ap netenen menmen au hiram mamkepi keremem au. Hiram mamnipi hir han yaaik nanwenipi niuk me God nanriuwerem. ¹³Menmen im yaaim yi yairiak ni yinan em hiram mamteiknor yi yises him me God werek werek yi yewepyapir him me Krai. Hir nanir pewek yi yaitiwem mamtike mit han en, hir nanwenipi niuk me God nanriuwerem. ¹⁴Te maain hir hanhan nanri hir nantike God hirak kakikepi naanmamri kakantar hirak kerekyi han te yi yiriak menmen im yekepi yeriuwerem. ¹⁵Haiu emtip God hirak yaaik kentar menmen yaaim hirak kewetaiyem. Menmen im haiu ap te mamtip hiram yaaim markeik? Au, hirak yaaik wetpen enuk kepeit kentar presen ik hirak Jisas Krai God Nikan kirak kerekek hirak kewetaiyek.

x 9:6 Pro 11:24; 22:9 y 9:7 Ro 12:8 z 9:9 Sam 112:9 a 9:10 Ais 55:10; Hos 10:12

b 9:11 2Ko 1:11, 4:15 c 9:12 2Ko 8:14

Pol kewenin him enum me mit hir natip aposel hir enun

10 ^{1d}Hi Pol hirekes hi hanhan hekeyi han ki yi han kitet menmen Krai kirkakem. Hirak kewenin han kirak me menmen, hirak kirkak menmen han yaaik ketike mit. Mit han nekre nimin ne yi mit hir natip me hi nar ik. Hir natip, “Wi kerek hirak kau ketikewai, hirak kewenin han kirak katip him yaaik ketikewai, te maain hirak keit wit hak, hirak kewisai tiwei kenai ketpai him manp me menmen.” Te in ek hi hitihi him manp. ^{2e}Maain wi hi anen ari, yi ap yenipa me menmen im te hi ani har ke hi ane mit han en natip haiu mit in mises menmen enum me ti miriak menmen mikaap mit meriuwerem. ³Haiu ap mises menmen me ti miriak menmen au. Haiu mau ti miriak menmen te haiu ap miriak menmen me God meriuwe menmen mit ne ti hir nisesim au. ^{4f}Menmen yapirwe haiu metenenim miriak menmen me God meriuwerem, hiram ap menmen me ti au. Haiu metenen menmen iuwe me God hiram mekepai haiu maminin menmen enum me Seten mewenin han ke mit ap nises him me God. (Menmen iuwe me God hiram mar ke nopen ketike hine, yipo henmik kerek mit hir netenenim nen newen paaik nen netike mit nenepan.) ⁵Menmen iuwe me God haiu metenenim hiram minin him enum me ti mit hir nisesim, o menmen hir han kitetim minin mewenin han kir te hir ap nertei God au. Meriuwe menmen iuwe me God haiu metenenim, haiu mari menmen yapirwe mekre han ke mit hiram mamises him me Krai. ^{6g}Haiu memerir yi mit miyapir en, yi eiweikin han eiyses him me God werek werek. Yi eiyses God werek werek nepei au, haiu mamriak menmen enum me mit hir ninapen nanimtau him me God haiu mamrekyor enum emrerim.

⁷Yi mit han kitet yar ik: “Karkeik te Pol hirak mitik God kehimitanek kewepyapir him mirak hirak ap kertei katip him iuwe?” Mit han nau nekri yi mit en, kerek natip Krai kehimitenor hir natip mit him mirak, hir han ekitet menmen im. Mar ke hir ne Krai, haiu mit in haiu ne Krai. ^{8h}Mitik Iuwe Krai kewisai haiu mekrehir kirak, haiu miriak menmen im mamkepi yi eiysesik werek werek, haiu ap te mamriwaank au. Te hi hewenipi niuk me haiu hiras me menmen haiu miriakem, hi ap yink enuk au. Hi han yaaik. ⁹Hi hinapen yi han kitet hi hanhan hewisi tiwei ik henipi yi yineina weinin au emit! ¹⁰Hi hinapen yi han kitet menmen marim me hi hentar hi hertei mit han en hir natip me hi nar ik: “Pol kewisai him iuwe mau tiwei hirak kesiuwaiyek kari han kiau keriuwerek, te hirak kerp kekrai ketin ke nimin, hirak kineinai ketpai him manp au. Him mirak hiram menmen weinim.” ¹¹ⁱMit han en natip nar ik hir

^d 10:1 1Ko 2:3 ^e 10:2 1Ko 4:21 ^f 10:4 Ef 6:13-17 ^g 10:6 2Ko 2:9 ^h 10:8 2Ko 12:6, 13:10 ⁱ 10:11 2Ko 13:2, 10

han ekitet him me hi hetpiyem. Menmen haiu mewisiyem mau tiwei ik metpiyem meriuwerek me wi haiu mepu yanimin, hiram him keremem haiu mamnen mamri haiu mamriakem.

¹²JHaiu minapen han kitet haiu mar ke mit en o haiu mehimitenai haiu mire mit en kerek newenipi niuk mir natip mit han em. Mit narik hir hiras nehimitan menmen hir han kitet hiram yaaim, hir nir menmen hir hiras niutip niutip niriakem te hir han kitet hir yaain. Mit nar ik hir enun netaritari. ¹³KTe haiu mit ap mamwenipi niuk maiu mar ke hir mit en niriakem au. Haiu mamwenipi niuk maiu me menmen God kehimitenai haiu miriakem. Menmen hirak kehimitenai haiu miriakem, hiram nepei man miuni yi mit. ¹⁴Haiu ap minin menmen God kehimitenai haiu miriakem au. Haiu minin man metpi him yaaim me Kraiss, te in ek haiu mewenipi niuk mai haiu minin naanmipri. ¹⁵Haiu ap minin menmen God kehimitenai haiu miriakem, te haiu mamwenipi niuk maiu me menmen mit han hir nepei niriakem au. Haiu han kitet menmen mar ik. Haiu han kitet yi yayises him me God wisenum te yi eikepai haiu emriak menmen wisenum kerek God kehimitenai haiu emriakem. ¹⁶Yi yairiak menmen mamir im te haiu mamnawiri mamno mamtip mit miyapir him yaaim me Kraiss mamit wit ham yanimin mit newi. Te haiu ap mamnawir menmen God kehimitenaiyem haiu mamriakem au. Haiu ap mamwepyapir him me God meit wit hak kerek mitik hak kinin kan nepei kiriakem, te haiu mamri menmen mirak haiu mamwenipi niuk maiu mamriuwerek au. ¹⁷Him em God Jeremaia kewisim mau tiwei, hiram matip mar im:

“Mit kerek hir hanhan nanwenipi hiras me menmen, hir nanwenipi Mitik Iuwe God kerek ek me menmen im. Hir hiras au emit!”

¹⁸Him im yaaim, te haiu mertei mit kerek newenipi niuk mir me hiras keriyen, God ap kaktip hir mit iuwe au. Hiram menmen weinim. God hirekes kakwenipi niuk me mit, hir keriyen niuk mir iuwe. Te haiu mit aposel ap te nanwenipi niuk maiu haiu iuwe au.

**Pol kewepyapir menmen enum mit enun kerek
natip hir hiras aposel hir niriakem**

11 ¹Hi hanhan yi eiwisa hi hatip him kemipin kike hewenipi niuk mai. Hi hertei yi yanapen te yi eiwisa. ²PGod hirak hanhan kakihimitan mit miyapir hir nirak, te mar im hi Pol hi han kiteti yi mit miyapir en. Hi nepei hehimiteni yi eiwit mitik kiutip yi eitikerek eiye niutip, niuk me mitik ik hirak Kraiss. Hi hanhan ariuweti yi eino Kraiss eiye ke mite nihan yaaip ap wiwaai wetike mitik wen au. ³In ek, hi

^J 10:12 2Ko 3:1, 5:12 ^k 10:13 Ro 12:3 ^l 10:15 Ro 15:20 ^m 10:16 Ap 19:21 ⁿ 10:17 1Ko 1:31 ^o 10:18 1Ko 4:4-5 ^p 11:2 Ef 5:26-27 ^q 11:3 Jen 3:4, 13

han kitet me manpen nipaa hirak enuk kewisesik kari han ke mite Ip. Hi hinapen him enum me mit natip hir aposel hiram mamri han ki mamriwaank, te yi ap eyises Kraiss werek werek han ekitetik kerekek. ⁴Hi hinaain hentar menmen im. Mitik hak kaknen kakitpi him ham me Jisas ham em, him im hiram ap him haiu metpiyem me Jisas au. Mar im yi eyit himin hak, ap God Himin Yaaik kerek nipaa yi yetiwek kekere han ki au. Yi yemtau him ham yi yisesim, hiram ap him nipaa yi yemtewem yisesim au. Mitik kar ik hirak kaknen kaku nimin ke yi mit, yi han yaaik eiwisik kakriakem keremem.

⁵Mit in yi han kitet hir aposel yaain kerek netpi me hi ap aposel hir nemitipin. Hir nemitipin nentar hi han kitet hi yaaik hinin mit aposel ni ein kerek netpi hir yaain iuwe. Hir nesiuwau him natip yi mit hi mitik enuk weinik. ⁶Hi ap atip him mei yaaim, te hi hari han ke mit heriuwerem har ke hir mit aposel han en niriakem au. Hir natip werek werek me menmen im, te hi hertei menmen yapirwe me God werek werek. Hir au. Nipaa haiu men haiu meteikni haiu mertei iuwe menmen me God iuwe meriuwe menmen yapirwe haiu miriakem yi yirem.

⁷Yi han kitet hi herekyi menmen enum a? Yi han kitet hi mitik enuk weinik hentar hi hatip mit miyapir him me God, te hi ap hari pewek mi mererim a? Hi naanmire hirekes. Hi ap hises menmen har ke aposel han niriakem nari pewek mi mererim te yi han kitet hi herekyi enum a? ⁸Hi hau hetikewi hiriak menmen, mit miyapir ne weiwik me God nerer wit wit ne provins Masedonia neweto pewek. Mar im hi hari menmen mir weinim. ⁹Nipaa hi hau hetikewi hiriak menmen, wi kerek menmen mai hiram epei au mesi, hi ap hitihi ari han ki me menmen o pewek au. Nai yinan neit provins Masedonia nan neweto menmen yapirwe hi hanhan em. Me menmen yapirwe nipaa ere in hi ap hitihiyem enipi yi han enuk yeriuerem au. Maain hi ariakem mamir ek. ¹⁰Him yaaim me Kraiss mau mekre han kaiu, te hi hetpi werek. Ap mitik kei kiutip hirak kakweikin han kai hi hewenipi niuk me hi hirekes me menmen me pewek hi hisesim hiriakem heit provins ki Akaia. ¹¹Hi henmak te hi hatip har ik a? Yi han kitet hi ap hanhan heriuwi a? Taauye! God kertei han kai hi hanhani.

¹²Hi tewen ehises menmen im nipaa hi hiriakem te hi ewepyapir mit aposel enun kerek natip hir niriak menmen yaaim nar ke haiu mit aposel haiu miriakem. Hir newenipi niuk mir hiras nerp ninaan me mit natip hir niriak menmen haiu miriakem te hi hanhan menmen hi hisesim mamwepyapir hir enun newisesik, hir him mir weinim. ¹³Hir

^r 11:4 Ga 1:8-9 ^s 11:5 1Ko 15:10; 2Ko 12:11; Ga 2:6 ^t 11:6 1Ko 2:1, 13; Ef 3:4

^u 11:7 1Ko 9:12, 18 ^v 11:8 Fl 4:15-18 ^w 11:9 2Ko 12:13 ^x 11:10 1Ko 9:15 ^y 11:13 2Ko 2:17; Fl 3:2

ap mit aposel au. Hir mit enun newisesik. Hir newisesik me menmen hir niriakem hir nisawin han kir hir nari han ke mit miyapir te hir niri hir natip, “Hir mit yaain aposel ne Kraiss.” ¹⁴Yi han kekrit eiriuwerem au emit! Hiram menmen weinim. Haiu mertei Seten hirekes kisawin han kirak kari han ke mit hir han kitet hirak ensel yaaik ke God. ¹⁵Haiu mertei Seten kiriak menmen im te haiu ap han kekrit me mit kerek nises menmen mirak. Hir nises Seten hir nisawin han kir nari han ke mit te hir natip hir mit yaain niriak menmen yaaim. Hiram menmen weinim. Maain God kakrekyor enum me menmen enum hir niriakem.

Wi Pol kiriak menmen me God menmen enum yapirwe mewaankek

¹⁶Hi pike hetpi heteipim. Hi hinapen yi han kitet hi mitik enuk hetaritari. Yi han kitet hi mitik enuk hetaritari yi eiwisa hi hewenipi niuk mai kike me menmen. ¹⁷Hi ap hatip har ke mitik kises Kraiss ketpim, te hi tewen hetpi him im e. Hi hatip har ke mit aposel in hir nenwenipi niuk mir te hi hatip him manp hewenipi niuk mai. ¹⁸Mit yapirwe aposel en hir newenipi niuk mir me menmen hir niriakem neit ti ik te hi ehises menmen hir niriakem hi awenipi niuk mai. ¹⁹Yi mit yi han kitet yi yertei menmen yapirwe te yi han yaaik yemtau him enum mit enun netaritari netpiyem a? ²⁰Yi yewis mit aposel en nemipin kerek hir nari han ki yi yises him mir yar ke mit nekre winak enuk nises him me gavman. Yi yewisi neit menmen mi yapirwe nepei au mesi, nari han ki me him mir hir netpi newisesiyek, hir newenipi niuk mir ninin naanmipri, hir newir his nenep ninaan mi. ²¹Yi yewisi hir nerekyi menmen enum mar im te hi yink enuk hetpi menmen im. Nipaa haiu man mau metikewi haiu minaain miriak menmen mar hir niriakem me yi mit. Mit hanhan nanwenipi niuk mir me menmen hir niriakem, hi ewenipi niuk mai etikeri. In ek, hi tewen atip har ke mitik enuk ketaritari ap kises God hi hewenipi niuk mai.

²²Hi mit aposel nemipin natip hir mit Hibru ne weiwik me Isrel a? Hi mitik Hibru ke weiwik me Isrel har ke hir mit en. Hir natip hir nepenyerer ne maam nipu Ebrahim a? Hi nepenyek ke maam nipu Ebrahim har ke hir mit en. ²³Hi mit natip hir wok mit ne Kraiss a? In ek hi pike hatip har ke mitik enuk ketaritari ap kises Kraiss werek werek. Hi hiriak menmen me Kraiss hi hinini heriuwerem. Hi hiriak menmen hi hinini, te menmen im hi are etpiyem mamteikni hi hiriak menmen iuwe me Kraiss te mit han nerekyo enum. Hi nepei hen hekre winak enuk ke gavman hi hinini hen yapirwe hentar hi hatip mit him yaaim me God. Mit neiyep neriuwe waai yapirwe te hi hinini hentar hi hatip mit him yaaim me God. Menep hi hahi yapirwe te yi han kitet mit aposel en

^z 11:16 2Ko 12:6 ^a 11:22 Fl 3:5 ^b 11:23 Ap 16:23; 1Ko 15:10

nemipin hir ninina a? ²⁴ cHi wen heteikni hi hinini. Mit iuwe ne gavman ne Isrel hir netauhis nar hispinak (5) hir niwaai nipin neiyep mar ³⁹ nentar hi hatip mit him me Kraiss. ²⁵ dMit iuwe ne gavman ne Rom hir netauhis mar wikak hir niwaai nipin neiyep neriuwerek nentar hi hatip mit him me Kraiss. Wi ham mit netauhis newir nan neiyep menep hi hahi henterim. Nipaa hi hau sip mar wikak, hiram men wan ke nimin mewep haisu meniuwe menterer tipar. Nipaa me wi im hi heniuwe henterer wan he hinkewi ere wanewik ere pike hinkewi. ²⁶ eWi yapirwe hi hitet yayiwe hen ein ein, mani miniu menep hiram mamiyep hi hahi, mit enun nekintip menmen hir nisawin newenanaan naniyep nankintip menmen mai. Mit ne weiwik mai me Isrel hir hanhan naniyep hi hahi, mit han ap ne weiwik me Isrel hir hanhan naniyep. Hi heit wit, mit, hanhan naniyep hi hahi. Hi heit yaank weinik menmen eim sk miyak hiram menep mamiyep. Hi heit wan ke nimin menep wan kisisau yipir hi hahi. Mit han nemipin hir natip hir nai yinan ne Kraiss menep hir nerewaank menmen hi hiriakem. ²⁷ fHi hiriak menmen iuwe ere his hit nanamir meiyewo. Witaan yapirwe, hi ap hiwaai au, hi hepu hitehi God menmen. Wi ham hi ninpi meiyoy hentar hi ap heit menmen mei au, o tipar mei te hi ahim au. Wi yapirwe hi ap heit menmen werek te hi ahim, hi nime meiyap iuwe hi heperper, hi ap hetenen klos te hi hiwapin yink kai heriuwerem werek werek au.

²⁸ gMenmen im keremem meteikni hi hiriak menmen iuwe me God hinin mit aposel nemipin au. Hekrit hekrit hi han kitet mit miyapir ne weiwik miutip me God nerer wit wit hir nepu werek werek o au. ²⁹ hNai yinan ne Kraiss, hir niriak menmen enum, te hi herteiyem hi hanhani. Wi ham mitik hak kari han ke mitik hak, te hirak kiriak menmen enum, hi han enuk heriuwe mitik kerek kari han kirak.

³⁰ iHi ewenipi niuk mai me menmen te hi awenipi niuk mai me menmen mamteikin mit hi ap hepu werek werek au, menmen enum yapirwe merewaank. ³¹ jGod kerek hirak Haai ke Mitik Iuwe Jisas Kraiss, hirak niuk mirak iuwe mamu tipmain tipmain enum eik, hirak kertei hi ap hewisewik au. Hi hiriak menmen mirak iuwe. ³² kNipaa wi hi hepu wit Damaskas, mitik gavman ke mitik iuwe King Aretas, hirak kinat mit hir nanino naanmamre ya weipir ke niwa meweiikin wit kir hir nemeriyau hi anen, te hir nantauhis nanwisa ekre winak enuk. ³³ lHir nantauhis nanwisa ekre winak enuk, te nai han yinan ne Kraiss hir newisa hekre wapnake o basket iuwe, hir nen niwa kewekin wit, hir ninaaiwir waai hi hekiuwe ere hiun ti heik kesikekre enuk te hi hetpaan hinaaiwirek hi hirir hen.

^c 11:24 Diu 25:3 ^d 11:25 Ap 16:22, 14:19 ^e 11:26 Ap 9:23, 14:5 ^f 11:27 1Ko 4:11; 2Ko 6:5 ^g 11:28 Ap 20:18-21, 31 ^h 11:29 1Ko 9:22 ⁱ 11:30 2Ko 12:5 ^j 11:31 2Ko 1:23
^k 11:32 Ap 9:23-25

Pol kityak kir menmen God keteikniwekem

12 ¹Hi wen awenipi niuk mai. Hi hertei menmen im ap mekepai God kaktip hau yaain, te hi wen hetpi menmen hi hityak hirem metike menmen misawin Mitik Iuwe Krai kewepayapirem. ²Nipaa ein 14 tito God ketauhis hi ke Krai, hirak keriya hi hen hetikerek wen wit kirak Heven. Hi hepitari hi yink kai ken o himin kerekek hirak kinaawir yink kai ken. God kerekek hirak kertei. ³Hi hetpi heteipim. Hi hepitari hi yink kai ken o himin kerekek ken. God kerekek hirak kertei. ⁴Hi heit wit ke God, hi hemtau menmen hi ap te hetpiyem heriuwe him mai. God ap kewisa hi hewepayapirem hatip mit em. ⁵¹Menmen im hi hirem hiram menmen yaaim te hi awenipi niuk mai menterim. Te hi au hinapen. Hi hanhan awenipi niuk mai me menmen meteikin hi ap hepu werek werek au, menmen enum yapirwe merewaank, te hi mitik enuk weinik, God kerekek hirak Iuwe.

⁶^mHi hanhan awenipi niuk mai hentar menmen hi hirem hi ap mitik enuk hetaritari au. Hi hirem. Hi ap hewisesik au. Te hi hinapen hewenipi niuk mai te yi mit ap han ekitet hi mitik iuwe henterim. Au, hi hanhan yi han ekitet menmen hi hiriakem, menmen hi hetpiyem, te yi yerteiya hi mitik yaaik o au.

Pol katip me menmen mewaank yink kirak

⁷^mMenmen im yapirwe God keteiknewem meit wit kirak, hiram menmen yaaim iuwe. God hirak kinapen hi ewenipi niuk mai menterim, te hirak kewis Seten hirak kesiuwe menmen man mekre yink kai menipa hi hinap, te hi ap hanhan ewenipi niuk mai. ⁸Hi hitehi God wikak te hirak kakikepa kakkir menmen enum im mekre yink kai hiram mamnopin. ⁹^oHi hitiwekhiyem wikak hirak ketpo wikak kar ik: “Au hi ahipirem hiram emnopin au. Hi ahu atikewit te hiram werek. Mit kerek hir ap manpenun neit, menmen mai iuwe mekepi meteikin mit em.” Te in ek, hi ap han enuk heriuwerem au. Hi han yaaik hewenipi niuk mai me menmen yapirwe enum merewaank, te menmen iuwe me Krai mamu mamikra. ¹⁰Hi hertei menmen im hi hiriakem hiram mamwenipi niuk me Krai, te hi ap han enuk hi ap manpenuk, o mit hir nerekyo enum o hir nerewaank, o menmen enum man meiyep te hi hau werek werek au, hiram menmen weinim. Hi ap han enuk hentar hi hertei wi menmen im mamnen mamnipa hi ap manpenuk, Krai kakikepa hi ehit menmen mirak iuwe hi ahu werek werek.

¹ 12:5 2Ko 11:30 ^m 12:6 2Ko 10:8, 11:16 ⁿ 12:7 Jop 2:6 ^o 12:9 Fl 4:11-13

Pol hanhan kikaap mit ne Korin nanises him me God werék werék

¹¹P^pHi nepei hatip hire mitik enuk ketaritari hi hewenipi niuk mai. Hi hinapen te yi yenipa hi hiriakem hentar yi ap yewenipi niuk mai yatip mit han hi mitik yaaik aposel au. Hi hire mitik weinik te mit aposel han kerek yi yatip hir yaain, hir ap ninina me menmen miutip au. ¹²Q^qMenmen hiram meteikni hi hire mitik yaaik aposel, hi henip han kai tokik me menmen enum man meiyep, hi hiriakem nimin ke yi mit miyapir en. Menmen hi hiriakem heteikniyem hiram mar im. Hi hiriak menmen heriyai heriyai meteikni menmen God kiriakem te mit hir nirem hir han kekrit kekrit neriuwerem nir menmen iuwe me God. ¹³T^tMit miyapir ne weiwik miutip me God nerer wit wit hir nepei neit menmen mekam hi ap hewetiye m a? Menmen im miutip. Hi ap hitihi yi naanemprau me menmen o winak au. Yi han kitet menmen im hiram enum te yi ap han kitet menmen enum im hi nepei herekiyiem hentar hi hiriak menmen yapirwe hekepi heriuwerem.

¹⁴U^uIn ek hi hanhan anen ari meiyam wikak, te hi ap ari menmen me yi mit eikepa eiriuwerem au. Hi hinapen menmen mi au. Hi hanhan yi mit miyapir keriyen eiyses Kraiss werék werék kerekek. Nikerek hir ap neit menmen naanmire miye haai neriuwerék au. Miye haai hir neit menmen naanmipre nikerek neriuwerem. Hi hire haai ki me menmen me Kraiss, yi yire nikerek nai te hi ap ehit menmen mi au emit! ¹⁵V^vHi han yaaik wisenuk hi hewir menmen mai yapirwe, hi hiriak menmen iuwe ere hi hahi, te hi akaap yi mit miyapir himin ki. Hi hanhan iuwe akepi, te maain yi hanhana kike emrerim a?

¹⁶W^wMit han ne yi mit hir natip nar ik: “O, hiram him yaaim. Hirak ap kari menmen maiu haiu merteiyek au. Te Pol hirak mitik enuk kewisesik kari han kiau kininai keriuwe him mirak kar ke mitik kari han ke miyak keriuwe menmen mau tirpe.” ¹⁷X^xYi eiyitpo hi hiriakem harkeik a? Hi hewisesiyek hari menmen mi heriuwe mitikit hi heriuwetet tan tiri a? Taauye! ¹⁸Y^yHi hitehi Taitas him manp te hirak kaknen kakri. Hi heriuwetek hirak kaknen kaktike kiau yinak hak ik. Taitas hirak kewisesik kari menmen mi o au a? Au. Hirak ketikewa hawir ap wises menmen mipiram au a? Yi han ekitet menmen im werék werék!

¹⁹Z^zHi han kitet yi yekine tiwei im yi han kitet haiu mewisi tiwei im mamri han ki, te yi han kitet haiu yain a? Auye! Naiu yinan yaain, haiu mit ne Kraiss, God kirai haiu metpi menmen im. Haiu mewisi him mekre tiwei im keremem, hiram mamkepi yi eiyses him me God werék werék. ²⁰AA^aHaiu mewisi tiwei im mentar menmen im. Hi han kitet yapirwe me menmen im. Hi hinapen maain hi anen ari yi mit ap yises menmen mar

^p 12:11 2Ko 11:5 ^q 12:12 Ro 15:19 ^r 12:13 2Ko 11:9 ^s 12:14 2Ko 13:1 ^t 12:15 Fl 2:17
^u 12:18 2Ko 8:6, 16-18 ^v 12:20 2Ko 2:1-4

ke hi hanhan yi yisesim, te yi einapen menmen maain hi ehisesim akepi ariuwerem. Hi han kitet hi anen ari yi yainehan me menmen, yi hemkre menepam me menmen, yi han enuk me menmen, yi yenke yewep pinan nen in nen ein, yi eisiuwe ni yinan him enum, yi eiypitepan yayisesan me menmen, yi paan tokik, yi ap yekiyau yau han kiutip au, yi yises menmen heriyai heriyai. ²¹ *Hi han kitet maain hi anen ari, God hirak kaknipa hi yink enuk ahirp ninaan mi, hi han tewenin mit kerek hi apiri eninopin enkeipin mit miyapir ne weiwik miutip me God en. Hi apiri entar hir niriak menmen enum hir ap neweikin sip newet menmen enum mar im. Hir nises menmen enum, hir netike miyapir hir nariyanhis neweninem, hir han kir kekrit kekrit me menmen enum heriyai heriyai. Te hi hinapen ahir mit miyapir nar ik.

Pol katip mit miyapir ne Korin hir naanempre menmen hir nisesim

13 ¹ *In ek hi anen ari meiyam wikak. Mit han ne yi mit hir hanhan nansiuwe nir yinan him enum, yi eiyses menmen him me God ketpim me menmen im. Mitikit wik o wikak hirakit tatwenhi me menmen im mit hir nanwepyapirem. ² Hi hanhan hatip yi mit miyapir nipaa yi yiriak menmen enum yetike yi mit han en. Nipaa hi hepu hetikewi meiyam wik, hi hetpi him manp me menmen. In ek hi wen hepu yanimin hi hetpi heteipim. Maain hi pike anen ari, hi ap ewis mitik kei kiutip hirak kau weinim kerek nipaa hirak kiriak menmen enum ap keweikin sip kewetiwem au. Hi arekyi enum entar yi hanhan hi ateikni menmen iuwe me Kraismewa. ³ Maain hi anen, yi eiyrtei werek werek hi hekrehir ke Kraismewa. Hi skelim yi mit me menmen yi yiriakem. Menmen me Kraismewa hiram ap menmen kike te yi eiyninem. Au, hiram menmen iuwe mamriwaank me menmen enum yi yisesim. ⁴ Nipaa Kraismewa hirak keweikin kar ke haiu mit, te mit netiwekhis newenkekik kau nu tentarakit hirak kaa. Te in ek God kewetiwek menmen mirak iuwe mikiak hirak pike kekrit kepu. Haiu metike Kraismewa haiu mau niutip haiu ap mit iuwe au. Te God kakikepai kakriuwe menmen mirak iuwe, te maain haiu mamnen, haiu mamwepyapir menmen im iuwe nimin ke yi mit en me wi haiu skelim yi mit me menmen.

⁵ *Yi han ekitet hiras te yi eiyrtei werek werek yi yises him yaaime Kraismewa mekre han ki o au. Yi han ekitet hiras. Yi ap yertei Kraismewa Jisas hirak au kekrehan ki a? Yi yisesik werek werek hirak kau kekrehan ki, o au en, taau! ⁶ Hi han kitet yi yertei Kraismewa Jisas kau kekrehan kaiu. Haiu ap mit enun mewisesik au. ⁷ Haiu mitehi God hirak kakikepi yi ap eiriak menmen enum eiysesim au emit! Haiu ap mitiwekhi me menmen im te mit nanir menmen iuwe me God haiu mamrekyiyem mamriwaank mamriuwerem, te mit nanirtei God kehimitenei haiu mit aposel. Menmen im au, hir han ekitet haiu mit enun

* 12:21 2Ko 13:2 x 13:1 2Ko 12:14; Mt 18:16; 1Ti 5:19 y 13:4 Fl 2:7-8 z 13:5 1Ko 11:28

weinin, hiram menmen weinim. Haiu hanhan yi eiriak menmen yaaim eiyises keremem. ⁸aYi yertei haiu mit ap mamriak menmen mamremir him yaaim au. Haiu emriak menmen keremem hiram mamkaap him yaaim. ⁹Yi yises him me Kraiis werek werek, haiu han yaaik ap mamteikin mit menmen maiu iuwe me God mamiwaank menmen enum mit nisesim. Te hir han kitet haiu mit enun weinin, hiram werek. Hekrit hekrit haiu mitehi God kakikepi te yi eiyises him mirak werek werek. ¹⁰bGod keweto menmen mirak iuwe hi skelim mit miyapir ne weiwik me God neriuwerem, te hi hinapen hariwaank yi mit miyapir en ariuwerem au emit! Te yi eiynin eiyises him mai werek werek mau tiwei ik me wi hi wen heit yanimin. Yi eiweikin sip eiwet menmen enum, te maain hi anen ari hi ap ariwaank ariuwe menmen mai iuwe me God au. Hi akepi yi eiyu werek eiriuerem keriyen.

Him ham kike mikaru

¹¹cNaiu yinan, in ek haiu meremir him metpi yi yaain. Yi eiweikin sip eiwet menmen enum eiyises menmen yaaim keremem. Yi eiyimtau him hi hetpiyem mau tiwei ik yi eiyisesim. Yi eikepan yi eiyu han kiutip yi eikiyan eiyu eiyit, te God kerek hirak han teweninai kekepai haiu mamu werek werek, hirak kaku kaktikewi.

¹²dYi mit miyapir ne God en, yi eiketanhis eitike ni yinan eiyitpor hir yaain.

¹³Mit miyapir ne weiwik miutip me God in hir netpi yi yaain.

¹⁴Hi hanhan Mitik Iuwe Jisas Kraiis hirak kakrekyi menmen yaaim, God hirak han tewenini, God Himin Yaaik hirak kaktikewi kaku kakikre han ki.

Mepir keremem

^a 13:8 1Ko 13:6 ^b 13:10 2Ko 2:3, 10:8 ^c 13:11 Ro 15:33 ^d 13:12 Ro 16:16